

საჯარო ინფორმაციის პროაქტიული გამოქვეყნების პრაქტიკა საქართველოს საჯარო დაწესებულებებში

2022



სარჩევი

ძირითადი მიგნებები	3
შესავალი	5
ინფორმაციის პროაქტიული გამოქვეყნების შეფასების მეთოდოლოგია	6
ინფორმაციის პროაქტიული გამოქვეყნების სტატისტიკა	9
ცენტრალური საჯარო დაწესებულებები	13
სამინისტროებს დაქვემდებარებული უწყებები	17
საქართველოს მთავრობასთან ანგარიშვალდებული და სხვა დამოუკიდებელი უწყებები	19
აჭარის ავტონომიური რესპუბლიკის საჯარო დაწესებულებები	20
ინფორმაციის პროაქტიული გამოქვეყნების პრაქტიკა	21
პროაქტიულად გამოქვეყნებული ინფორმაციის ფორმატი და არქივი	23
ინფორმაციის პროაქტიული გამოქვეყნების დინამიკა	25
საჯარო ინფორმაციის პროაქტიული გამოქვეყნების კარგი პრაქტიკა და რეკომენდაციები	30

კვლევაზე მუშაობდნენ:

გოგა თუმურაშვილი

ქეთი თოფურია

გამოქვეყნების თარიღი:

იანვარი, 2023



შვედეთი
Sverige

მოცემული მასალის მომზადება დაფინანსებულია შვედეთის საერთაშორისო განვითარების თანამშრომლობის სააგენტოს, Sida-ს მიერ. შინაარსზე პასუხისმგებლობა სრულად ეკისრება მის შემქმნელს. Sida შესაძლოა არ იზიარებდეს გამოთქმულ ხედვებსა და ინტერპრეტაციებს.

ძირითადი მიგნებები

- 2013 წლიდან, საქართველოს ხელისუფლებას, ინფორმაციის პროაქტიული გამოქვეყნების სტანდარტის გაუმჯობესების მიზნით, მნიშვნელოვანი ნაბიჯები არ გადაუდგამს.
- მონიტორინგის ობიექტი 128 საჯარო დაწესებულებიდან, 2022 წლის დეკემბრის მდგომარეობით 13-ს საერთოდ არ ჰქონდა საკუთარი ვებგვერდი; მათ შორის, კულტურის და სპორტის სამინისტროს.
- 17 საჯარო დაწესებულებას ვებ-გვერდზე არ ჰქონდა შექმნილი საჯარო ინფორმაციის განყოფილება ან ამ განყოფილებაში არ ჰქონდა არანაირი ინფორმაცია გამოქვეყნებული;
- 2022 წელს საჯარო ინფორმაციის პროაქტიული ხელმისაწვდომობის საშუალო მაჩვენებელი 60%-ია, რაც 4%-ით აღემატება 2021 წლის, ხოლო 11 %-ით ჩამორჩება 2014 წლის ანალოგიურ მაჩვენებელს;
- 2022 წელს, შესაბამისი სამართლებრივი აქტის მოთხოვნების დაცვით მხოლოდ 3 საჯარო დაწესებულებას (საფინანსო-ანალიტიკური სამსახური, სტატისტიკის ეროვნული სამსახური, განათლების ხარისხის განვითარების ეროვნული ცენტრი) ჰქონდა სრულყოფილად (100%-ით) გამოქვეყნებული ინფორმაცია;
- ცენტრალურ საჯარო დაწესებულებებს შორის ყველაზე დაბალი შეფასება აქვთ მთავრობის ადმინისტრაციას (34%), საგარეო საქმეთა სამინისტროს (35%) და შერიგებისა და სამოქალაქო თანასწორობის საკითხებში სახელმწიფო მინისტრის აპარატს (30%).
- მთავრობის ვებ-გვერდზე სახელმწიფო შესყიდვებთან და ფინანსებთან დაკავშირებული ინფორმაციის უდიდესი ნაწილი კვლავ წარმოდგენილია 2014 წლის მდგომარეობით. შესაბამისად, მთავრობის ადმინისტრაცია 2014 წლიდან ფაქტობრივად არ ასრულებს საქართველოს მთავრობის დადგენილებით განსაზღვრულ ვალდებულებებს.
- ცენტრალურ საჯარო დაწესებულებებს შორის, მთავრობის დადგენილების შესრულების ყველაზე მაღალი შეფასება აქვთ შინაგან საქმეთა სამინისტროს (97%) და თავდაცვის სამინისტროს (96%);
- 2021 წელთან შედარებით, 14 ცენტრალური საჯარო დაწესებულებიდან 7-მა, გააუარესა ინფორმაციის პროაქტიული გამოქვეყნების მაჩვენებელი;

- 2021 წელთან შედარებით, სამინისტროებს დაქვემდებარებული სსიპ-ების ინფორმაციის პროაქტიული ხელმისაწვდომობის მაჩვენებელი 3%-ით გაუმჯობესდა. მიუხედავად ამისა, მათ 43%-ს, სავალდებულოდ გამოსაქვეყნებული ინფორმაციის 50%-ზე ნაკლები ჰქონდა განთავსებული საკუთარ ვებგვერდზე;
- ყველაზე პრობლემური საკითხი, კვლავ ფინანსების განკარგვასთან დაკავშირებული ინფორმაციის გამოქვეყნება რჩება;
- არცერთ შეფასებულ საჯარო დაწესებულებას არ ჰქონდა გამოქვეყნებული ინფორმაცია ღია მონაცემების (მაგ. CSV ან XML) სახით. 38 საჯარო დაწესებულებას კონკრეტული ფინანსური ინფორმაცია გამოქვეყნებული ჰქონდა Excel-ის ფორმატში;
- მხოლოდ 61 საჯარო დაწესებულების ვებგვერდზე იყო ხელმისაწვდომი განვლილ წლებში პროაქტიულად გამოქვეყნებული ინფორმაციის არქივი.

შესავალი

საჯარო ინფორმაციის პროაქტიული გამოქვეყნება საქართველოს მიერ ღია მმართველობის პარტნიორობის (OGP) ფარგლებში აღებული ერთ-ერთი უმნიშვნელოვანესი ვალდებულებაა, რომლის მთავარი მიზანი საჯარო დაწესებულებების პროაქტიული ანგარიშვალდებულების და გამჭვირვალობის უზრუნველყოფაა.

2013 წლის 26 აგვისტოს საქართველოს მთავრობის N219 დადგენილებით, საწყის ეტაპზე ქვეყანაში დამკვიდრდა პროაქტიული გამჭვირვალობის გარკვეული სტანდარტი, რომელიც სამომავლოდ საჭიროებდა გაუმჯობესებას. კერძოდ, მთავრობის ამ დადგენილებით განსაზღვრული სავალდებულო პროაქტიულად გამოსაქვეყნებელი ინფორმაციის ნუსხა¹, მოიცავს ადმინისტრაციული ორგანოების საქმიანობასთან და ფინანსებთან დაკავშირებული მინიმალური ინფორმაციის ჩამონათვალს, რომელიც ვერ უზრუნველყოფს პროაქტიული გამჭვირვალობის მაღალ სტანდარტს. 2013 წლის შემდეგ, მიუხედავად IDFI-ს არაერთი რეკომენდაციისა საქართველოს ხელისუფლებას მისი გაუმჯობესების თვალსაზრისით მნიშვნელოვანი ნაბიჯები არ გადაუდგამს. წლებია საქართველოს ხელისუფლების მხრიდან, სათანადო რეაგირების გარეშე რჩება IDFI-ს ინიციატივა, რომელიც ითვალისწინებს ინფორმაციის პროაქტიული გამოქვეყნების არსებული სტანდარტის გაუმჯობესებას და რეფორმის მეორე ტალღის განხორციელებას. საქართველოს ხელისუფლების მხრიდან ასევე, რეაგირების გარეშე დარჩა IDFI-ს ინიციატივა, რომელიც ითვალისწინებდა კოვიდ-19 კრიზისის დროს საჯარო დაწესებულებების მიერ პროაქტიულად გამოსაქვეყნებელი ინფორმაციის ახალი ნუსხის დამტკიცებას. აღნიშნული ნუსხა ქვეყანაში არსებული გამოწვევების და საერთაშორისო პრაქტიკის გათვალისწინებით IDFI-მ შეიმუშავა და საქართველოს ხელისუფლებას რეკომენდაციის სახით წარუდგინა.

ამასთან, განვლილ წლებში IDFI-ს კვლევები ცხადყოფდა, რომ საჯარო დაწესებულებების უმრავლესობა ვერ უზრუნველყოფდა მთავრობის არსებული დადგენილებით დაკისრებული მინიმალური ვალდებულებების ჯეროვან შესრულებასაც კი.

როგორც აღვნიშნეთ, მიუხედავად IDFI-ს არაერთი მცდელობისა, ამ დრომდე ინფორმაციის პროაქტიული გამოქვეყნების არსებულ სტანდარტში, მნიშვნელოვანი ცვლილებები არ შესულა. შესაბამისად, წინამდებარე ანგარიშის ფარგლებში, განხორციელებული საჯარო ინფორმაციის პროაქტიული ხელმისაწვდომობის კვლევის მეთოდოლოგიაში ცვლილებები კვლავ არ განხორციელებულა.

¹ სამოქალაქო საზოგადოებასთან კონსულტაციების, შეხვედრებისა და მოლაპარაკებების ხანგრძლივი პერიოდის შემდეგ, ინფორმაციის თავისუფლების განვითარების ინსტიტუტისა (IDFI) და სხვა არასამთავრობო ორგანიზაციების აქტიური მხარდაჭერით, საქართველოს მთავრობამ 2013 წლის 26 აგვისტოს მიიღო №219 დადგენილება „საჯარო ინფორმაციის ელექტრონული ფორმით მოთხოვნისა და პროაქტიულად გამოქვეყნების შესახებ“. დადგენილება ძალაში შევიდა 2013 წლის 1 სექტემბერს და მთავრობის მმართველობის სფეროში შემავალ საჯარო დაწესებულებებს დაევალიათ „საჯარო ინფორმაციის“ ვებგვერდების შექმნა და მთავრობის დადგენილების დანართით გათვალისწინებული ინფორმაციის გამოქვეყნება საკუთარ ელექტრონულ რესურსებზე 2013 წლის 31 დეკემბრამდე.

ანგარიშში წარმოდგენილია საქართველოში საჯარო ინფორმაციის პროაქტიული ხელმისაწვდომობის შეფასება **2022 წლის დეკემბრის** მდგომარეობით და მოცემულია ინფორმაციის პროაქტიული ხელმისაწვდომობის ტენდეციები განვლილ წლებთან შედარებით. ანგარიში მოიცავს ასევე საჯარო დაწესებულებათა პროაქტიული გამჭვირვალობის რეიტინგებს.

ინფორმაციის პროაქტიული გამოქვეყნების შეფასების მეთოდოლოგია

საქართველოს მთავრობის დადგენილების თანახმად კვარტალურად გამოსაქვეყნებელი ინფორმაცია ქვეყდება კვარტლის დასრულებიდან ერთი თვის ვადაში, ხოლო წლიურად გამოსაქვეყნებელი ინფორმაცია წლის დასრულებიდან სამი თვის ვადაში. შესაბამისად, მონიტორინგის განხორციელების პერიოდში (2022 წლის ნოემბერი-დეკემბერი) დაწესებულებებს საკუთარ ვებ-გვერდებზე, განთავსებული უნდა ჰქონოდათ :

- **ყოველწლიური ინფორმაცია** - 2021 წლის სრული მონაცემები
- **კვარტალური ინფორმაცია** - 2021 წლის სრული და 2022 წლის I, II და III კვარტლის მონაცემები
- **ინფორმაცია რომელიც განახლებას ექვემდებარება გარკვეული ცვლილების შემთხვევაში** - უახლესი მონაცემები

შეფასების მეთოდოლოგია სრულად ეფუძნება საქართველოს მთავრობის დადგენილებით განსაზღვრულ პროაქტიულად გამოსაქვეყნებელი ინფორმაციის ნუსხას და აფასებს, თუ რამდენად სრულყოფილად პასუხობს საჯარო დაწესებულებათა მიერ გამოქვეყნებული ინფორმაცია დადგენილებით გაწერილ ვალდებულებებს, როგორც შინაარსობრივი, ისე პერიოდულობის თვალსაზრისით. საჯარო ინფორმაციის პროაქტიული გამოქვეყნების მაქსიმალურ შეფასებას წარმოადენს 100 ქულა (100%). საქართველოს მთავრობის დადგენილებით გათვალისწინებული თითოეული ქვეპუნქტის მიხედვით მაქსიმალური შეფასებები გამოიყურება შემდეგნაირად:

**შეფასების მეთოდოლოგია მთავრობის დადგენილებით განსაზღვრული
ნუსხის ქვეპუნქტების მიხედვით**

1		2		3		4		5		6		7	
N	ქულა	N	ქულა	N	ქულა	N	ქულა	N	ქულა	N	ქულა	N	ქულა
1.1	3	2.1	3	3.1	3	4.1	3	5.1	3	6.1	3	7.1	2
1.2	3	2.2	3	3.2	3	4.2	3	5.2	3	6.2	2	7.2	2
1.3	3	2.3	3	3.3	3	4.3	3	5.3	3				
1.4	3	2.4	3			4.4	3	5.4	3				
1.5	3	2.5	3					5.5	3				
1.6	3							5.6	3				
								5.7	3				
								5.8	3				
								5.9	3				
								5.10	3				
								5.11	3				
								5.12					
								5.13	4				

როგორც შეფასების ცხრილიდან ჩანს, საქართველოს მთავრობის დადგენილებით გათვალისწინებული 35 ქვეპუნქტიდან 30-ის შემთხვევაში თითოეულის მაქსიმალური შეფასება შეადგენს 3 ქულას, ხოლო 5 ქვეპუნქტი განსხვავებული მაქსიმალური ქულათა რაოდენობით ფასდება. აღნიშნული ქვეპუნქტები შერჩეული იქნა შემდეგი გარემოებების გათვალისწინებით:

- 1) ქვეპუნქტები 5.12 და 5.13 (ერთად 4 ქულა) -** 5.13 ქვეპუნქტი, რომელიც ითვალისწინებს სამართლებრივ აქტებს საბიუჯეტო კოდექსით გათვალისწინებული ფონდებიდან ადმინისტრაციული ორგანოსათვის გამოყოფილი თანხების შესახებ, სრულად მოიცავს 5.12 ქვეპუნქტში გათვალისწინებულ ინფორმაციას (5.12 ქვეპუნქტი ითვალისწინებს აღნიშნული ფონდებიდან გამოყოფილი თანხების შესახებ ზოგად კვარტალურ ინფორმაციას).

შესაბამისად ინსტიტუტის მიერ აღნიშნული პუნქტები ფასდება ერთობლივად. შეფასების დროს ინსტიტუტის მიერ პრიორიტეტად მიჩნეულია აღნიშნული თანხების გამოყოფის შესახებ სამართლებრივი აქტების განთავსება.

- 2) **ქვეპუნქტი 6.2 – (2 ქულა)**- მოცემული ქვეპუნქტი ითვალისწინებს იმ ინდივიდუალური ადმინისტრაციულ-სამართლებრივი აქტების გამოქვეყნებას, რომლებიც ადმინისტრაციული ორგანოს შეფასებით, საზოგადოებრივი ინტერესის შემცველია. ვინაიდან შემფასებელს არ შეუძლია განსაზღვროს, რომელ ინდივიდუალურ სამართლებრივ აქტს მიიჩნევს კონკრეტული ადმინისტრაციული ორგანო საზოგადოებრივი ინტერესის შემცველად, აღნიშნული ქვეპუნქტის მიხედვით განთავსებული ინფორმაცია ფასდება მხოლოდ მაქსიმალური 2 ქულით.
- 3) **ქვეპუნქტები 7.1 და 7.2 (თითოეულს 2 ქულა)** - ამ ქვეპუნქტებით განსაზღვრულია საჯარო დაწესებულებათა სერვისების, მოსაკრებლების, ტარიფებისა და საფასურების შესახებ ინფორმაციის პროაქტიული გამოქვეყნება. ვინაიდან დაწესებულებათა დიდი ნაწილი მომხმარებლებს არ სთავაზობს რაიმე სახის სერვისს და შესაბამისად არ აქვთ დადგენილი რაიმე სახის ტარიფები, მოსაკრებლები და საფასურები (გარდა საჯარო ინფორმაციის გაცემასთან დაკავშირებული მოსაკრებლებისა, რომლის შესახებ ინფორმაციის განთავსება ისედაც სავალდებულოა საჯარო ინფორმაციის გვერდზე) ინსტიტუტის მიერ თითოეულის შესახებ ინფორმაციის განთავსება ფასდება მხოლოდ მაქსიმალური 2 ქულით.

საქართველოს მთავრობის დადგენილების მიხედვით, მისი მოქმედების სფერო² არ ვრცელდება საქართველოს მთავრობასთან ანგარიშვალდებულ და სხვა დამოუკიდებელ მთელ რიგ საჯარო დაწესებულებებზე. მსგავსი უწყებები შეფასდა³ მათ მიერ მიღებული სამართლებრივი აქტებით, რომლებიც ძირითად შემთხვევაში, საქართველოს მთავრობის მიერ დადგენილი სტანდარტის იდენტურია.

- **სტატისტიკის ეროვნული სამსახური** - სტატისტიკის ეროვნული სამსახურის აღმასრულებელი დირექტორის 2018 წლის 9 ნოემბრის N199 ბრძანება;
- **კონკურენციის სააგენტო** - კონკურენციის სააგენტოს თავმჯდომარის 2014 წლის 20 ნოემბრის N15 ბრძანება;
- **სახელმწიფო დაცვის სპეციალური სამსახური** - სახელმწიფო დაცვის სპეციალური სამსახურის უფროსის 2015 წლის 21 ივლისის N25040 ბრძანება;
- **ინტელექტუალური საკუთრების ეროვნული ცენტრი** - საქპატენტის თავმჯდომარის 2021 წლის 24 მარტის N2 ბრძანება.

² საქართველოს მთავრობის 2013 წლის 26 აგვისტოს N219 დადგენილების მოქმედება ვრცელდება: საქართველოს მთავრობის ადმინისტრაცია, სამინისტროები, სახელმწიფო მინისტრის აპარატი, სახელმწიფო საქვეყნო დაწესებულება, სამინისტროს მმართველობის სფეროში მოქმედი საჯარო სამართლის იურიდიული პირები და საქართველოს მთავრობის უშუალო დაქვემდებარებაში არსებული აღმასრულებელი ხელისუფლების სპეციალური დანიშნულების გასამხედროებული დაწესებულება.

³ საქართველოს მთავრობასთან ანგარიშვალდებული ის უწყებები, რომელთა მიერ საჯარო ინფორმაციის პროაქტიულ გამოქვეყნებასთან დაკავშირებით მიღებული სამართლებრივი აქტები არ იყო ხელმისაწვდომი, შეფასდა საქართველოს მთავრობის დადგენილებით განსაზღვრული ნუსხის მიხედვით.

- **პერსონალურ მონაცემთა დაცვის სამსახური** - სამსახურის უფროსის 2022 წლის 16 მარტის N7 ბრძანება

მონიტორინგის ფარგლებში, საქართველოს მთავრობის სისტემაში შემავალი უწყებების გარდა, ასევე შეფასდა საქართველოს პარლამენტი, პრეზიდენტის ადმინისტრაცია, აჭარის ავტონომიური რესპუბლიკის უმაღლესი საბჭო, აჭარის ავტონომიური რესპუბლიკის მთავრობის აპარატი და სამინისტროები. აღნიშნული უწყებები შეფასდა შემდეგი სამართლებრივი აქტებით განსაზღვრული პროაქტიულად გამოსაქვეყნებელი ინფორმაციის თითოეული პუნქტის მიხედვით:

- **საქართველოს პარლამენტი** - საქართველოს პარლამენტის თავმჯდომარის 2013 წლის 31 დეკემბრის N132 ბრძანება;
- **პრეზიდენტის ადმინისტრაცია** - საქართველოს პრეზიდენტის 2013 წლის 2 სექტემბრის N692 ბრძანებულება;
- **აჭარის ა/რ-ის უმაღლესი საბჭო** - აჭარის ა/რ-ის უმაღლესი საბჭოს 2022 წლის 16 ივნისის N54-III დადგენილება;
- **აჭარის ა/რ-ის მთავრობის აპარატი და სამინისტროები** - აჭარის ა/რ-ის მთავრობის 2013 წლის 10 ოქტომბრის N23 დადგენილება.


ინფორმაციის პროაქტიული გამოქვეყნების სტატისტიკა

2022 წლის ნოემბერი-დეკემბერში IDFI-მ შეისწავლა საჯარო ინფორმაციის პროაქტიული გამოქვეყნების პრაქტიკა 128 საჯარო დაწესებულებაში და ამ მიზნით განახორციელა შემდეგ უწყებათა ვებ-გვერდების მონიტორინგი:

- **საქართველოს პარლამენტი**
- **საქართველოს პრეზიდენტის ადმინისტრაცია**
- **საქართველოს მთავრობის ადმინისტრაცია**
- **12 - სამინისტრო/სახელმწიფო მინისტრის აპარატი**
- **88 - სამინისტროს დაქვემდებარებული სსიპ და საქვეუწყებო დაწესებულება**
- **19 - საქართველოს მთავრობასთან ანგარიშვალდებული და სხვა დამოუკიდებელი უწყებები**
- **აჭარის ა/რ-ის უმაღლესი საბჭო**
- **აჭარის ა/რ-ის მთავრობის აპარატი**
- **4 - აჭარის ა/რ-ის სამინისტრო**

მონიტორინგის ობიექტი 128 საჯარო დაწესებულებიდან, 13 უწყებას საერთოდ არ ჰქონდა საკუთარი ვებგვერდი, 8 უწყების შემთხვევაში ვებგვერდზე არ იყო შექმნილი საჯარო ინფორმაციის განყოფილება, ხოლო 9 უწყების შემთხვევაში საჯარო ინფორმაციის გვერდზე არ

ჰქონდათ გამოქვეყნებული არანაირი ინფორმაცია. ერთ უწყებას არ გააჩნდა საკუთარი ვებგვერდი, თუმცა საჯარო ინფორმაციის განყოფილება შექმნილი იყო მისი ზემდგომი უწყების ელექტრონულ რესურსზე. დანარჩენი 97 საჯარო დაწესებულების ვებგვერდზე შექმნილი იყო საჯარო ინფორმაციის განყოფილება და პროაქტიულად იყო გამოქვეყნებული ინფორმაცია. (მათ შორის სამი უწყების საჯარო ინფორმაციის პროაქტიული გამოქვეყნების წესი და სტანდარტი შიდა სამართლებრივი აქტით დაინერგა/განახლდა 2022 წლიდან, შესაბამისად საანგარიშო წლის დასრულებამდე IDFI-მ აღნიშნული უწყებების შეფასებისგან თავი შეიკავა).



იმ უწყებებს შორის, რომლებსაც მონიტორინგის პერიოდში არ ჰქონდათ ვებგვერდი, ვებგვერდზე არ ჰქონდათ შექმნილი საჯარო ინფორმაციის განყოფილება, ან საჯარო ინფორმაციის განყოფილებაში არ ჰქონდათ ინფორმაცია გამოქვეყნებული, უმრავლესობა მიეკუთვნებოდა სამინისტროებს დაქვემდებარებულ საჯარო სამართლის იურიდიულ პირებს. **ერთადერთ სამინისტროს წარმოადგენს კულტურისა და სპორტის სამინისტრო, რომელიც 2021 წლის მარტში გამოეყო განათლებისა და მეცნიერების სამინისტროს და დაახლოებით 20 თვის გასვლის შემდეგაც ვებ-გვერდის შექმნა არ არის უზრუნველყოფილი.**

სამინისტროებს დაქვემდებარებულ უწყებებს შორის ვხდებით ისეთ უწყებებს რომლებიც დაარსდნენ მიმდინარე წელს და ვებგვერდების შექმნა თუ მათზე საჯარო ინფორმაციის განთავსება ვერ იქნა უზრუნველყოფილი მონიტორინგის პერიოდისთვის. მაგალითად, 2022 წელს შეიქმნა სსიპ კურორტების განვითარების სააგენტო და სსიპ სივრცითი და ქალაქთმშენებლობითი განვითარების სააგენტო.

თუმცა, მსგავსი უწყებების უმრავლესობის დაარსებიდან/რეორგანიზაციიდან გასული იყო ერთწელზე მეტი. შესაბამისად, შესაბამისი ნების არსებობის პირობებში, შესაძლებელი იყო

პროაქტიული გამჭვირვალობის უზრუნველყოფა . მაგალითად, 2018 წელს სასჯელაღსრულების და პრობაციის სამინისტროს იუსტიციის სამინისტროს საქვეუწყებო დაწესებულება - სპეციალურ პენიტენციურ სამსახურად გარდაქმნის შემდეგ, მათ საჯარო ინფორმაციის განყოფილებაში შესაბამისი ინფორმაცია აღარ გამოქვეყნებულა და ვებგვერდზე კვლავ მითითებულია, რომ ის მუშაობს სატესტო რეჟიმში.

ასევე ვხდებით შემთხვევებს, როდესაც მონიტორინგის პროცესში ცალკეული სსიპ-ების საჯარო ინფორმაციის განყოფილება ტექნიკური სამუშაოების თუ სხვა მიზეზთა გამო არ იყო ხელმისაწვდომი. მაგალითად, გარემოსდაცვითი ზედამხედველობის დეპარტამენტის, ასევე ველური ბუნების სააგენტოს საჯარო ინფორმაციის განყოფილებაში განთავსებული დოკუმენტების გაცნობა მონიტორინგის პროცესში ვერ მოხერხდა.

საჯარო ინფორმაციის გვერდზე არ აქვთ არანაირი ინფორმაცია გამოქვეყნებული/განახლებული ან მონიტორინგის პროცესში საჯარო ინფორმაციის გვერდი იყო გათიშული	
1	სპეციალური პენიტენციური სამსახური
2	ეროვნული უსაფრთხოების საბჭოს აპარატი
3	ბაზარზე ზედამხედველობის სააგენტო
4	გარემოსდაცვითი ზედამხედველობის დეპარტამენტი
5	ველური ბუნების ეროვნული სააგენტო
6	მიწის მდგრადი მართვისა და მიწათსარგებლობის მონიტორინგის ეროვნული სააგენტო
7	ნავთობისა და გაზის სახელმწიფო სააგენტო
8	სსიპ დელტა

არ აქვთ ვებგვერდზე საჯარო ინფორმაციის განყოფილება	
1	ევრაზიის სატრანსპორტო დერეფნის საინვესტიციო ცენტრი
2	ინოვაციების და ტექნოლოგიების სააგენტო
3	ლევან მიქელაძის სახელობის დიპლომატიური სასწავლო და კვლევითი ინსტიტუტი
4	ზურაბ ჟვანიას სახელობის სახელმწიფო ადმინისტრირების სკოლა
5	საქართველოს კინემატოგრაფიის ეროვნული ცენტრი
6	შემოქმედებითი საქართველო
7	რელიგიის სააგენტო
8	სახელმწიფო ენის დეპარტამენტი

9	თავდაცვის სამინისტროს სამხედრო ჰოსპიტალი
---	--

არ აქვთ საკუთარი ვებგვერდი	
1	კულტურისა და სპორტის სამინისტრო
2	დანაშაულის პრევენციის, არასაპატიმრო სასჯელთა აღსრულებისა და პრობაციის ეროვნული სააგენტო
3	მსჯავრდებულთა პროფესიული მომზადებისა და გადამზადების ცენტრი
4	ინფორმაციული ტექნოლოგიების სააგენტო
5	საგანგებო სიტუაციების კოორდინაციისა და გადაუდებელი დახმარების ცენტრი
6	დასაქმების ხელშეწყობის სახელმწიფო სააგენტო
7	შრომის ინსპექციის სამსახური
8	ანაკლიის ღრმაწყლოვანი ნავსადგურის განვითარების სააგენტო
9	კურორტების განვითარების სააგენტო
10	კიბერ უსაფრთხოების ბიურო
11	სივრცითი და ქალაქთმშენებლობითი განვითარების სააგენტო
12	სახელისუფლებო სპეციალური კავშირების სააგენტო
13	სახელმწიფო უზრუნველყოფის სააგენტო

2022 წლის დეკემბრის მდგომარეობით იმ საჯარო დაწესებულებათა ინფორმაციის პროაქტიული ხელმისაწვდომობის საშუალო მაჩვენებელი, რომლებსაც შესაბამისი დადგენილების მიხედვით ვებგვერდზე გამოქვეყნებული აქვთ საჯარო ინფორმაცია (სულ 95 საჯარო დაწესებულება), შეადგენს 60%-ს. შესაბამისად, მოცემული უწყებები მათზე კანონით დაკისრებული ვალდებულების მნიშვნელოვან ნაწილს არ ასრულებენ.

ინფორმაციის პროაქტიული ხელმისაწვდომობის არსებული მდგომარეობის სრულფასოვანი შესწავლის მიზნით, მნიშვნელოვანია მონიტორინგის შედეგების, საჯარო დაწესებულებათა სახეების და გამოქვეყნებული ინფორმაციის თემატური ჯგუფების მიხედვით ანალიზი.

ცენტრალური საჯარო დაწესებულებები

მონიტორინგის შედეგების მიხედვით, საქართველოს ცენტრალური საჯარო დაწესებულებების (პარლამენტის აპარატი, მთავრობის ადმინისტრაცია, სამინისტროები) საჯარო ინფორმაციის პროაქტიული გამოქვეყნების მაჩვენებლები 30%-დან 97%-მდე მერყეობს. მათ შორის, ყველაზე მაღალი შედეგი, საქართველოს შინაგან საქმეთა სამინისტრომ (97%) აჩვენა.

საქართველოს შინაგან საქმეთა სამინისტროს შემთხვევაში, ვებ-გვერდზე პროაქტიულად გამოქვეყნებული ინფორმაცია, ძირითად შემთხვევაში სრულად აკმაყოფილებს საქართველოს მთავრობის დადგენილებით დაწესებულ მოთხოვნებს. თუმცა, ფინანსური ინფორმაციის გამოქვეყნებისას უმეტესწილად კვლავ შემოიფარგლება მხოლოდ დადგენილების მოთხოვნების შესაბამისი ჯამური მონაცემების ხელმისაწვდომობით და არ ქვეყნდება დეტალურად ჩაშლილი ინფორმაცია. IDFI-ს შეფასებით შინაგან საქმეთა სამინისტროს მიერ არასრულყოფილად არის წარმოდგენილი საანგარიშო პერიოდში საბიუჯეტო ფონდებიდან თანხის გამოყოფის შესახებ სამართლებრივი აქტები და განხორციელებული შესყიდვების შესახებ ინფორმაცია. მაგალითად, სამინისტროს ვებგვერდზე არ არის ხელმისაწვდომი საქართველოს მთავრობის 2021 წლის 24 დეკემბრის N2333 განკარგულების ასლი, რომლის მიხედვით სამინისტროს მთავრობის სარეზერვო ფონდიდან გამოეყო 5 მილიონი ლარი, ფულადი ჯილდოების გაცემის მიზნით. ასევე, სამინისტროს ვებ-გვერდზე გამოქვეყნებული განხორციელებული შესყიდვების შესახებ ინფორმაცია, არ ფარავს გამარტივებულ შესყიდვებს. აღნიშნულ საკითხებთან დაკავშირებით, სამინისტროდან ინფორმაციის მიღება ასევე გართულებულია საჯარო ინფორმაციის გამოთხოვის გზითაც.

ამავე დროს, შინაგან საქმეთა სამინისტრო წარმოადგენს ერთ-ერთ იშვიათ გამონაკლისს, რომელიც საჯარო ინფორმაციის გვერდზე დოკუმენტაციას აქვეყნებს როგორც ქართულ ასევე [ინგლისურ ენებზე](#).

ცენტრალურ საჯარო დაწესებულებებს შორის, ინფორმაციის პროაქტიული გამოქვეყნების თვალსაზრისით, მოწინავე პოზიციებს იკავებენ ასევე, საქართველოს თავდაცვის სამინისტრო (96%), საქართველოს განათლების, მეცნიერების კულტურისა და სპორტის სამინისტრო (93%) და საქართველოს პარლამენტის აპარატი (93%). მისასალმებელია ის ფაქტი, რომ თავდაცვის და განათლების სამინისტროების მიერ გათვალისწინებულია IDFI-ს მიერ ჯერ კიდევ 2014 წელს შემუშავებული რეკომენდაციები და უზრუნველყოფილია ზოგიერთი კატეგორიის მონაცემთა დეტალური გამოქვეყნება. მაგალითად, ორივე სამინისტროს შემთხვევაში სამივლინებო ხარჯების შესახებ ინფორმაცია, სავალდებულოდ გამოსაქვეყნებელი ჯამური მონაცემების ნაცვლად წარმოდგენილია, თითოეულ თანამდებობის პირზე ცალ-ცალკე ხარჯვითი კატეგორიის მიხედვით. ავტოპარკის შესახებ გამოქვეყნებული ინფორმაცია შეიცავს დამატებით ისეთ დეტალებს როგორიცაა: ავტომობილის გამოშვების წელი, შესყიდვის თარიღი, საბალანსო ღირებულება და ნარჩენი ღირებულება. აღნიშნული სამინისტროების მიერ, მონიტორინგის პერიოდში არ იყო განახლებული სხვადასხვა ფინანსური ინფორმაცია. მაგალითად, თავდაცვის სამინისტროს მიერ ვებ-გვერდზე არ იყო გამოქვეყნებული 2022 წლის მე-2 და მე-3 კვარტლებში გაწეული სარეკლამო ხარჯების შესახებ ინფორმაცია. განათლების და მეცნიერების სამინისტროს მიერ ვებ-გვერდზე არ იყო წარმოდგენილი 2021 წელს მიღებული და გაცემული გრანტების შესახებ ინფორმაცია.

საქართველოს პარლამენტის 93%-იანი შედეგი, მიღებულია საქართველოს პარლამენტისათვის დამტკიცებული პროექტიულად გამოსაქვეყნებელი ნუსხის მიხედვით, სადაც სავალდებულო გამოსაქვეყნებლად განსაზღვრულია პარლამენტის ფუნქციურ საქმიანობასთან დაკავშირებული მნიშვნელოვანი ინფორმაცია. მონიტორინგის ფარგლებში პარლამენტის ვებგვერდზე განახლებული არ იყო სხვადასხვა სტატისტიკური ინფორმაცია. მაგალითად, 2021 წელს გადაღებული პლენალური და კომიტეტების სხდომების სტატისტიკა, საქართველოს პარლამენტის წევრთა მიერ საპარლამენტო დელეგაციების/საქართველოს პარლამენტის მეგობრობის ჯგუფების ფარგლებში განხორციელებული საერთაშორისო ვიზიტების რაოდენობის შესახებ სტატისტიკა და სხვ.

ცენტრალურ საჯარო დაწესებულებებს შორის, ინფორმაციის პროექტიული გამოქვეყნების ყველაზე დაბალი მაჩვენებლები აქვთ შერიგებისა და სამოქალაქო თანასწორობის საკითხებში საქართველოს სახელმწიფო მინისტრის აპარატს (30%), საქართველოს მთავრობის ადმინისტრაციას (34%) და საგარეო საქმეთა სამინისტროს (35%).

განსაკუთრებით პრობლემურად შესაძლებელია შეფასდეს ცენტრალურ საჯარო დაწესებულებებს შორის საქართველოს მთავრობის ადმინისტრაციის ერთ-ერთი ყველაზე დაბალი მაჩვენებელი. მიუხედავად იმისა, რომ 2022 წელს მთავრობამ გაუშვა ახალი ვებ-გვერდი, ინფორმაციის გამოქვეყნების გაუმჯობესების თვალსაზრისით მნიშვნელოვანი ნაბიჯები არ გადაღებულა. მაგ. **მთავრობის ვებ-გვერდზე სახელმწიფო შესყიდვებთან და ფინანსებთან დაკავშირებული ინფორმაციის უდიდესი ნაწილი კვლავ წარმოდგენილია 2014 წლის მდგომარეობით. შესაბამისად, მთავრობის ადმინისტრაცია 2014 წლიდან ფაქტობრივად არ ასრულებს საქართველოს მთავრობის დადგენილებით განსაზღვრულ ვალდებულებებს.**

ასევე, განსაკუთრებული მნიშვნელობისაა, 2020 წლის შემდეგ საქართველოს მთავრობის განკარგულებების ხელმისაწვდომობის შეზღუდვა. 2020 წელს, IDFI-ის მოთხოვნა მთავრობის განკარგულებების მოწოდების შესახებ, უპასუხოდ იქნა დატოვებული, რის შემდეგაც IDFI-მ მიმართა თბილისის საქალაქო სასამართლოს. სამწუხაროდ, სასამართლო პროცესი მნიშვნელოვანი შეფერხებით მიმდინარეობს და სასამართლო სხდომა დღემდე არ ჩანიშნულა. საქართველოს მთავრობის განკარგულებების ვებ-გვერდზე გამოქვეყნების შეწყვეტა სავარაუდოდ დაკავშირებულია მის შინაარსთან. მსგავსი მიდგომები მნიშვნელოვნად ეწინააღმდეგება საჯარო მმართველობისა და ანგარიშვალდებულების პრინციპებს.

აღსანიშნავია ის ფაქტი, რომ 2019 წლიდან საქართველოს მთავრობის ადმინისტრაციის ფუნქციად განისაზღვრა ღია მმართველობის პარტნიორობის (OGP) საქართველოს წევრობის კოორდინირება ეროვნულ და საერთაშორისო დონეზე. ეს გარემოება, საქართველოს მთავრობის ადმინისტრაციას ანიჭებს ანგარიშვალდებულებისა და გამჭვირვალობის პრინციპების დაცვის განსაკუთრებულ პასუხისმგებლობას.

საქართველოს მთავრობა

პრემიერ-მინისტრი | საქართველოს მთავრობა | სიახლეები | ადმინისტრაცია | პრესცენტრი | საჯარო ინფორმაცია | საქართველოს მესახე

მთავარი გვერდი / განკარგულებები

საქართველოს მთავრობის განკარგულებები

განკარგულებები

2020 2019 2018 2017 2016 2015 2014 2013 2012 2010 2009 2008 2007 2006

26 სექ 2020 საქართველოს მთავრობის განკარგულება N1896
2020 წლის 27 სექტემბერს სოხუმის დაცემის 27 წლისთავზე აფხაზეთის ომში დაღუპულთა ხსოვნის პატივის მიცემა...

24 აგვ 2020 საქართველოს მთავრობის განკარგულება N1633
2020 წლის 25 აგვისტოს გლეხის დღედ გამოცხადების შესახებ

მეტის წაკითხვა >

საქართველოს მთავრობის ვებ-გვერდზე განკარგულებების გამოქვეყნება 2020 წლიდან შეწყდა

შერიგებისა და სამაქალაქო თანასწორობის საკითხებში სახელმწიფო მინისტრის აპარატის და საგარეო საქმეთა სამინისტროს პროაქტიული გამჭვირვალობის დაბალი მაჩვენებლები უმეტესწილად განპირობებულია იმ ფაქტით, რომ 2021-2022 წლების ფინანსური ინფორმაციის უდიდესი ნაწილი ხელმიუწვდომელია.

დანარჩენი ცენტრალური საჯარო დაწესებულებების მაჩვენებლები 54%-დან 92%-მდე მერყეობს. ზოგიერთ უწყებას წლებია შეწყვეტილი აქვთ მთელი რიგი ფინანსური და სხვა კატეგორიის მონაცემების გამოქვეყნება, რაც უარყოფითად აისახება მათი ინფორმაციის პროაქტიული გამოქვეყნების მაჩვენებელზე.

მაგალითად, ეკონომიკისა და მდგრადი განვითარების სამინისტროს 2016 წლის შემდეგ არ გამოუქვეყნებია ინფორმაცია ბალანსზე რიცხული ავტომობილების და უძრავი ქონების, საწვავის ხარჯის, ავტომობილების ტექნიკური მომსახურების, სატელეკომუნიკაციო ხარჯების და მიღებული გრანტების შესახებ. ფინანსთა სამინისტროს 2014 წლის შემდეგ არ გამოუქვეყნებია ინფორმაცია სახელმწიფო ქონების გასხვებისა და სარგებლობაში გადაცემის შესახებ, ჯანდაცვის სამინისტროს 2015 წლის შემდეგ არ განუახლებია ინფორმაცია რეკლამაზე გაწეული ხარჯების შესახებ, გარემოს დაცვის და სოფლის მეურნეობის სამინისტროს 2019 წლის შემდეგ არ გამოუქვეყნებია ავტომობილების ტექნიკურ მომსახურებაზე გაწეული ხარჯების, ასევე მიღებული გრანტების და ბალანსზე რიცხული უძრავი ქონების შესახებ ინფორმაცია.

მონიტორინგის ფარგლებში შეფასდა ასევე საქართველოს პრეზიდენტის ადმინისტრაციის საჯარო ინფორმაციის პროაქტიული გამოქვეყნების პრაქტიკა. პრეზიდენტის ადმინისტრაციის საჯარო ინფორმაციის პროაქტიული გამოქვეყნების წესი დამტკიცდა, 2013 წლის 2 სექტემბრის N692 ბრძანებულებით, რომელიც საქართველოს მთავრობის მიერ დადგენილი სტანდარტის შეკვეცილ და მნიშვნელოვნად სახეცვლილ ვერსიას წარმოადგენს. საქართველოს მთავრობის


დადგენილებით განსაზღვრულ ნუსხაში თავმოყრილია 35 სახის ინფორმაცია, პრეზიდენტის ადმინისტრაციის შემთხვევაში კი მხოლოდ - 18. მაგალითად, პრეზიდენტის ადმინისტრაციას არ ეკისრება ისეთი ინფორმაციის გამოქვეყნების ვალდებულება როგორიცაა: ადმინისტრაციის წლიური ანგარიში, საჯარო ინფორმაციის გაცემასთან დაკავშირებული სამართლებრივი აქტები, ვაკანსიები და კონკურსის შედეგები, რეკლამის განთავსებაზე გაწეული ხარჯები და სხვა.

IDFI-ს შეფასებით, მონიტორინგის პერიოდში, პრეზიდენტის ადმინისტრაციის ვებგვერდზე წარმოდგენილი იყო სავალდებულოდ განსაზღვრული პროაქტიულად გამოსაქვეყნებელი ინფორმაციის 92%.



სამინისტროებს დაქვემდებარებული უწყებები


საჯარო დაწესებულებებში ინფორმაციის პროაქტიული გამოქვეყნების დაბალი საშუალო მაჩვენებელი (60%), უმეტესწილად განპირობებულია სამინისტროებს დაქვემდებარებული უწყებების მიერ საკუთარ ვებგვერდზე მწირი ინფორმაციის გამოქვეყნებით. კერძოდ, საჯარო სამართლის იურიდიული პირებისა და საქვეუწყებო დაწესებულებების ინფორმაციის გამოქვეყნების საშუალო მაჩვენებელი შეადგენს 56%-ს, მაშინ როდესაც მათი ზემდგომი ორგანოების საშუალო მაჩვენებელი 73%-ია.



სამინისტროთა დაქვემდებარებაში შემავალ უწყებათა საჯარო ინფორმაციის პროაქტიული გამოქვეყნების საშუალო მაჩვენებლები 15%-დან 75% -მდე მერყეობს. ყველაზე მაღალი საშუალო მაჩვენებელი შინაგან საქმეთა სამინისტროს სისტემაში შემავალმა უწყებებმა (სულ 7) აჩვენეს - 74,86%, ყველაზე დაბალი კი საგარეო საქმეთა სამინისტროს (1 უწყება) - 15%. შინაგან საქმეთა სამინისტროს დაქვემდებარებული უწყებების მიერ პროაქტიულად გამოქვეყნებული ინფორმაცია, მისი ზემდგომი სამინისტროს მსგავსად, უმეტესწილად ემსახურება საქართველოს მთავრობის დადგენილებით დაწესებული მინიმალური მოთხოვნების დაკმაყოფილებას და მომხარებელს არ სთავაზობენ პროაქტიული გამჭვირვალობის მაღალ სტანდარტს, რაც დეტალურად ჩაშლილი ინფორმაციის გამოქვეყნებას გულისხმობს.

საგარეო საქმეთა სამინისტროს დაქვემდებარებული უწყებების საჯარო ინფორმაციის პროაქტიული გამოქვეყნების საშუალო მაჩვენებელი მიღებულია, მხოლოდ სსიპ - საინფორმაციო ცენტრი ნატოსა და ევროკავშირის შესახებ მაჩვენებლის მიხედვით, ვინაიდან სხვა უწყებებს მონიტორინგის პერიოდში ვებ-გვერდი არ გააჩნდათ.

სამინისტროებს დაქვემდებარებული უწყებების საჯარო ინფორმაციის პროაქტიული გამოქვეყნების საშუალო მაჩვენებლები



სამინისტროებს დაქვემდებარებულ უწყებებს შორის, საჯარო ინფორმაციის პროაქტიული გამოქვეყნების 100%-იანი მაჩვენებლები, წინა წლის მსგავსად მხოლოდ ორმა უწყებამ სსიპ საფინანსო ანალიტიკურმა სამსახურმა და სსიპ განათლების ხარისხის განვითარების ეროვნულმა ცენტრმა მიიღო.

სამინისტროებს დაქვემდებარებული უწყებების 43%-ს, პროაქტიულად სავალდებულოდ გამოსაქვეყნებელი ინფორმაციის 50%-ზე ნაკლები ჰქონდა გამოქვეყნებული. საჯარო სამართლის იურიდიული პირები ვებგვერდზე უმეტესწილად ათავსებენ მხოლოდ უწყების შესახებ ზოგადი ხასიათის ცნობებს, რაც არ პასუხობს პროაქტიული გამჭვირვალობის პრინციპებს. საჯარო ინფორმაციის გამოქვეყნების 50%-ზე დაბალი მაჩვენებლები აქვთ ისეთ მაღალი საზოგადოებრივი მნიშვნელობის და შემოსავლების მქონე საჯარო სამართლის იურიდიულ პირებს როგორებიც არიან:


შემოსავლების სამსახური - 42%, სოციალური მომსახურების სააგენტო 40%, მუნიციპალური განვითარების ფონდი - 24%, ფინანსთა სამინისტროს საგამოძიებო სამსახური- 31%, კულტურული მემკვიდრეობის დაცვის ეროვნული სააგენტო 7% და სხვა.

საქართველოს მთავრობასთან ანგარიშვალდებული და სხვა დამოუკიდებელი უწყებები

მონიტორინგის ფარგლებში, IDFI-მ ასევე განახორციელა საქართველოს მთავრობასთან ანგარიშვალდებული და სხვა დამოუკიდებელი 18 უწყების ვებ-გვერდის მონიტორინგი, საიდანაც 13-ს საჯარო ინფორმაციის განყოფილებაში ჰქონდა გამოქვეყნებული გარკვეული ინფორმაცია. ამ უწყებების მიერ, უმეტესწილად დადგენილია საქართველოს მთავრობის დადგენილების იდენტური სტანდარტი, შესაბამისად შეფასებაში მნიშვნელოვანი მეთოდოლოგიური ცვლილებები არ განხორციელებულა. მათ შორის ორი უწყება, პერსონალურ მონაცემთა დაცვის სამსახური და სპეციალური საგამოძიებო სამსახური შეიქმნა 2022 წელს. საანგარიშო წლის დასრულებამდე IDFI-მ აღნიშნული უწყებების შეფასებისგან თავი შეიკავა.

დანარჩენი 11 მსგავსი უწყების მონიტორინგის შედეგების მიხედვით, ყველაზე მაღალი შედეგი სტატისტიკის ეროვნულმა სამსახურმა (100%) , კონკურენციის ეროვნულმა სააგენტომ (97%), საჯარო და კერძო თანამშრომლობის სააგენტომ (95%) და ინტელექტუალური საკუთრების ეროვნულმა ცენტრმა (95%) აჩვენეს. აღსანიშნავია ის ფაქტი, რომ სტატისტიკის ეროვნული სამსახურის მიერ, დამატებით უზრუნველყოფილია ზოგიერთი კატეგორიის მონაცემთა დეტალური გამოქვეყნება. მაგალითად, ბალანსზე რიცხული უძრავი ქონების შესახებ გამოქვეყნებულია ქონების დასახელება, ფართობი, პირველადი საბალანსო ღირებულება და ნარჩენი საბალანსო ღირებულება. ასევე, მიღებული გრანტების შემთხვევაში გამოქვეყნებულია საგრანტო ხელშეკრულებების რეესტრი, სადაც ასახულია გრანტის გამცემის, მიზნობრიობის, ხელშეკრულების ვადის, ღირებულების და საანგარიშო წელს ათვისებული გრანტის ოდენობის შესახებ დეტალური ინფორმაცია.

დანარჩენი უწყებების მაჩვენებლები 27%-დან 75%-მდე მერყეობს. მათ შორის ყველაზე დაბალი შეფასება, სახელმწიფო დაცვის სპეციალურმა სამსახურმა (27%), სახელმწიფო შეყიდვების სააგენტომ (30%) და იურიდიული დახმარების სამსახურმა (32%) აჩვენეს. ამ უწყებებს ვებ-გვერდზე წარმოდგენილი აქვთ უწყების საქმიანობასთან და საჯარო ინფორმაციის ხელმისაწვდომობასთან დაკავშირებული მხოლოდ ზოგადი ინფორმაცია და მნიშვნელოვნად შეზღუდულია ფინანსური ინფორმაციის ხელმისაწვდომობა.




აჭარის ავტონომიური რესპუბლიკის საჯარო დაწესებულებები

2022 წლის მონიტორინგის ფარგლებში, IDFI-მ ასევე განახორციელა აჭარის ავტონომიური რესპუბლიკის 5 საჯარო დაწესებულების (მთავრობის აპარატი და 4 სამინისტრო) ვებ-გვერდის მონიტორინგი.

აჭარის ა/რ-ის უმაღლესი საბჭოს საჯარო ინფორმაციის პროაქტიული გამოქვეყნების წესი და სტანდარტი შიდა სამართლებრივი აქტით განახლდა 2022 წელს. კერძოდ, უმაღლესი საბჭოს 2022 წლის 16 ივნისის №54- III დადგენილებით, მნიშვნელოვნად გაუმჯობესდა არსებული სტანდარტი და სავალდებულო გამოსაქვეყნებელ ინფორმაციას დაემატა ფუნქციურ საქმიანობასთან დაკავშირებული მნიშვნელოვანი ინფორმაცია. მიმდინარე მონიტორინგის ფარგლებში აღნიშნული დადგენილების მოთხოვნების შესაბამისად, დაწყებული იყო ინფორმაციის პროაქტიული გამოქვეყნება. თუმცა ცალკეული პუნქტების მიმართებით, უწყებას ინფორმაციის გამოქვეყნების ვალდებულება წარმოეშვა საანგარიშო წლის დასრულების შემდეგ, შესაბამისად IDFI-მ აღნიშნული უწყებების შეფასებისგან თავი შეიკავა.

აჭარის ა/რ-ის მთავრობის აპარატის და სამინისტროების მიერ ინფორმაცია პროაქტიულად გამოქვეყნებულია აჭარის ა/რ-ის მთავრობის ერთიან პორტალზე, სადაც თითოეული უწყებისთვის შექმნილია განცალკევებული საჯარო ინფორმაციის განყოფილება. აღნიშნული უწყებებისთვის, პროაქტიულად გამოსაქვეყნებელი ინფორმაციის ნუსხა განსაზღვრულია, აჭარის ა/რ-ის

მთავრობის 2013 წლის 10 ოქტომბრის N23 დადგენილებით, რომელიც საქართველოს მთავრობის დადგენილებით განსაზღვრული ნუსხის იდენტურია. კვლევის შედეგების მიხედვით, მათ შორის, ყველაზე მაღალი მაჩვენებელი აჭარის ა/რ-ის განათლების, კულტურის და სპორტის სამინისტროს ჰქონდა - 76%, ხოლო ყველაზე დაბალი აჭარის ა/რ-ის მთავრობის აპარატს 51%.



ინფორმაციის პროაქტიული გამოქვეყნების პრაქტიკა

საქართველოს მთავრობის დადგენილებით 35 პუნქტად ჩამოთვლილი საჯარო ინფორმაცია, მათი თემატიკის მიხედვით დაყოფილია 7 ჯგუფად:


- 1) ზოგადი ინფორმაცია ადმინისტრაციული ორგანოს შესახებ (6 პუნქტი);
- 2) საჯარო ინფორმაციის გვერდი (5 პუნქტი);
- 3) ინფორმაცია ადმინისტრაციული ორგანოს საკადრო უზრუნველყოფის შესახებ (3 პუნქტი);
- 4) ინფორმაცია ადმინისტრაციული ორგანოს მიერ განხორციელებული სახელმწიფო შესყიდვების და სახელმწიფო ქონების პრივატიზების შესახებ (4 პუნქტი);
- 5) ინფორმაცია ადმინისტრაციული ორგანოს დაფინანსების და ხარჯთაღრიცხვის შესახებ (13 პუნქტი);
- 6) სამართლებრივი აქტები (2 პუნქტი);
- 7) სხვა საჯარო ინფორმაცია (2 პუნქტი).


მონიტორინგის შედეგების მიხედვით, საჯარო დაწესებულებებისათვის ყველაზე პრობლემური იმ თემატურ ჯგუფებში გაერთიანებული ინფორმაციის გამოქვეყნება იყო, რომლებიც უკავშირდებოდა ადმინისტრაციული ხარჯების განკარგვას. მაგალითად, სახელმწიფო შესყიდვების და ქონების პრივატიზების თემატური ჯგუფის პროაქტიული ხელმისაწვდომობის

საერთო მაჩვენებელი მხოლოდ - 41,8%, ხოლო დაფინანსების და ხარჯთაღრიცხვის - 47,15%-ია. ამ ჯგუფებში, გაერთიანებულ ცალკეული პუნქტების მიხედვით, ყველაზე პრობლემური საბიუჯეტო ფონდებიდან მიღებული დაფინანსების (25,91%) შესახებ ინფორმაციის განთავსება იყო. ინფორმაციის პროაქტიული გამოქვეყნების დაბალი მაჩვენებელი დაფიქსირდა ასევე ისეთ ინფორმაციასთან დაკავშირებით, როგორიც არის: მიღებული გრანტები -31,81%, სახელმწიფო ქონების გასხვისება - 32,92%, გაცემული გრანტები - 34,05% და რეკლამის ხარჯი - 37,63%.

საჯარო დაწესებულებები პროაქტიულად ყველაზე მეტად აქვეყნებენ სამართლებრივი აქტების და ზოგადი ინფორმაციის თემატურ ჯგუფებში გაერთიანებულ ინფორმაციას, რომელიც ნაცვლად კვარტალური განახლებისა, ექვემდებარება გამოქვეყნებას მხოლოდ მასში ცვლილებების განხორციელების შემთხვევაში.

მაგალითად, ყველაზე მაღალი მაჩვენებლებია საკონტაქტო ინფორმაციის (97,4%), დებულება/წესდების (89,9%), უწყების სტრუქტურის (88,8%) და ნორმატიული აქტების (86,5%) კრიტერიუმებში.





პროაქტიულად გამოქვეყნებული ინფორმაციის ფორმატი და არქივი

მონიტორინგის ფარგლებში, IDFI-მ აგრეთვე შეისწავლა ინფორმაციის პროაქტიულ გამოქვეყნებასთან დაკავშირებული ისეთი საკითხები, რომელიც ეხება ინფორმაციის თემატურ განთავსებას, დათარიღებას, გამოქვეყნებული დოკუმენტაციის ფორმატს და არქივს.

საქართველოს მთავრობის დადგენილებაში არსებული ჩანაწერის მიხედვით, დაწესებულება ვალდებულია საჯარო ინფორმაციის გვერდზე განათავსოს მხოლოდ პროაქტიულად გამოსაქვეყნებელი ინფორმაციის ნუსხის მე-2 ნაწილში თავმოყრილი პუნქტები, რომლებიც დაკავშირებულია უშუალოდ საჯარო ინფორმაციის ხელმისაწვდომობასთან. რაც შეეხება სხვა სახის ინფორმაციას, დადგენილება დაწესებულებას საშუალებას აძლევს საკუთარი შეხედულებისამებრ გადაანაწილოს ვებ-გვერდზე, რაც მომხმარებელს ურთულებს კონკრეტული საკითხზე ინფორმაციის მოძიებას. მონიტორინგის შედეგების მიხედვით, 95 საჯარო


დაწესებულებებიდან 63-ს ინფორმაცია სრულად წარმოდგენილი ჰქონდა საჯარო ინფორმაციის გვერდზე თემატურად.

საჯარო დაწესებულებებს ეკისრებათ ვალდებულება ვებგვერდზე გამოქვეყნებულ ინფორმაციას მიუთითონ მისი განთავსების თარიღი. აღნიშნული ვალდებულება შესწავლილი დაწესებულებებიდან მხოლოდ 33-ს ჰქონდა შესრულებული.

საჯარო ინფორმაციის პროაქტიული გამოქვეყნების წესი საჯარო დაწესებულებებს არ ზღუდავს მონაცემების გამოქვეყნების ფორმატთან დაკავშირებით. საერთაშორისო კარგი პრაქტიკის, გათვალისწინებით ამ კუთხით განსაკუთრებით მნიშვნელოვანია საჯარო ინფორმაციის ღია მონაცემების ფორმატში გამოქვეყნება. საქართველოს საჯარო დაწესებულებებში მონიტორინგის პერიოდში არ დაფიქსირდა ღია მონაცემების (მაგ. CSV ან XML) ფორმატში გამოქვეყნების პრაქტიკა, რაც სამომავლოდ ხელს შეუწყობდა საქართველოს ღია მონაცემების პორტალის DATA.GOV.GE-ს განვითარებას. ამასთან შესწავლილი დაწესებულებებიდან როგორც ფინანსური ასევე სხვა სახის ინფორმაციის გამოქვეყნებისთვის ძირითადად იყენებენ PDF ფაილებს. მხოლოდ, 38 საჯარო დაწესებულება ჰქონდა გამოქვეყნებული Excel-ის ფორმატში გარკვეული ფინანსური ინფორმაცია.

ინფორმაციის პროაქტიული გამოქვეყნების სამართლებრივი აქტებით არ არის დარეგულირებული, მონაცემების ვებგვერდზე შენახვის/დაარქივების წესები. შესაბამისად, საჯარო დაწესებულების მიერ 2021 წლის მონაცემების გამოქვეყნების შემდეგ მას არ ეზღუდება ვებგვერდიდან 2020 ან წინა წლებისმიერი წლის პროაქტიულად გამოქვეყნებული ინფორმაციის აღება. შესწავლილი საჯარო დაწესებულებებიდან 61 -ის ვებგვერდზე შენახული იყო განვლილი წლების მონაცემები. დანარჩენ შემთხვევაში ვებგვერდზე წარმოდგენილი იყო მხოლოდ კონკრეტულ პერიოდში განახლებული მონაცემები.

ინფორმაციის პროაქტიულ გამოქვეყნებასთან დაკავშირებული სხვა საკითხები




ინფორმაციის პროაქტიული გამოქვეყნების დინამიკა

საჯარო ინფორმაციის პროაქტიული გამოქვეყნების მონიტორინგი, IDFI-მ ასევე ჩაატარა 2014, 2019, 2020 და 2021 წლებში. მიმდინარე წელსაც, მონიტორინგი განხორციელდა ანალოგიური მეთოდოლოგიით რაც იძლევა შედარებითი ანალიზის საშუალებას. კვლევის შედეგების თანახმად 2021 წელს, წინა წელთან შედარებით სჯარო დაწესებულებებში საჯარო ინფორმაციის პროაქტიული ხელმისაწვდომობა მხოლოდ 4%-ით გაუმჯობესდა. ცენტრალური საჯარო დაწესებულებების საერთო მაჩვენებელი წინა წელთან შედარებით 2%-ით გაუარესდა.


წინა წელთან შედარებით, ცენტრალური საჯარო დაწესებულებების გარდა, კვლევის ობიექტი საჯარო დაწესებულებების ყველა სხვა ჯგუფის საერთო მაჩვენებელი გარკვეულწილად გაუმჯობესებულია. სამინისტროებს დაქვემდებარებული უწყებების - 3%-ით, აჭარის ავტონომიური რესპუბლიკის საჯარო დაწესებულებების - 13%-ით, ხოლო მთავრობას დაქვემდებარებული და სხვა დამოუკიდებელი უწყებების 16%-ით გაუმჯობესდა.

აღსანიშნავია ის ფაქტი, რომ საჯარო დაწესებულებები ინფორმაციის პროაქტიული გამოქვეყნების სტანდარტის დამკვიდრების საწყის ეტაპზე, უფრო მაღალი პასუხისმგებლობით ასრულებდნენ მათზე დაკისრებულ ვალდებულებებს. მაგალითად, 2014 წლის მონიტორინგის შედეგებით, მთავრობის დადგენილების ძალაში შესვლიდან დაახლოებით 1 წლის შემდეგ, საერთო მაჩვენებელი შეადგენდა 71%-ს, რაც 15%-ით აღემატება 2021 წლის ანალოგიურ მაჩვენებელს.



შენიშვნა: 2014 და 2019 წლებში აჭარის ა/რ-ის საჯარო დაწესებულებების და მთავრობასთან ანგარიშვალდებული სსიპ-ების მონიტორინგი არ განხორციელებულა.

საქართველოს ცენტრალურ საჯარო დაწესებულებებს შორის, 2021 წელთან შედარებით ინფორმაციის პროაქტიული ხელმისაწვდომობის მაჩვენებელი ყველაზე მეტად გააუმჯობესეს რეგიონული განვითარებისა და ინფრასტრუქტურის სამინისტრომ (+8%) და ფინანსთა სამინისტრომ (+5%). ხოლო ყველაზე მეტად გააუარესეს იუსტიციის სამინისტრომ (-10%) და ჯანდაცვის სამინისტრომ (-9%).




2022 წელს სამინისტროებს დაქვემდებარებული 61 უწყებიდან (რომელთა შეფასებაც განხორციელდა როგორც 2022, ასევე 2021 წელს) წინა წელთან შედარებით 36-მა გააუმჯობესა მაჩვენებელი, 5 უწყებამ იგივე შეფასება მიიღო, ხოლო 20-მა გააუარესა.

სამინისტროებს დაქვემდებარებულ უწყებებს შორის ინფორმაციის პროაქტიულად ხელმისაწვდომობის მაჩვენებელი ყველაზე მეტად, გააუმჯობესეს შსს სასაზღვრო პოლიციამ (+75%) და სსიპ სამოქალაქო ავიაციის სააგენტომ (+46%).

ინფორმაციის პროაქტიული გამოქვეყნების მაჩვენებლის გაურესების თვალსაზრისით გამორჩეულია სსიპ იუსტიციის სახლი (-40%) და სახაზინო სამსახური (-31%). იუსტიციის სახლის შემთხვევაში, ვებგვერდზე გამოქვეყნებული იყო 2021-2022 წლების ფინანსური ინფორმაცია,

თუმცა მათი გაცნობა/ჩამოტვირთვა მომხმარებლისთვის შეუძლებელი იყო, რაც სავარაუდოდ ტექნიკურ ხარვეზთან იყო დაკავშირებული.



ინფორმაციის პროაქტიული გამოქვეყნების დინამიკის ანალიზის კუთხით, განსაკუთრებით მნიშვნელოვანია ისეთი უწყებების გამორჩევა რომლებიც განვლილი წლების მონიტორინგის ფარგლებში მომხმარებელს ვერ სთავაზობდნენ პროაქტიული გამჭვირვალობის მინიმალურ სტანდარტსაც და მისი გაუმჯობესებისათვის განახორციელეს ქმედითი ნაბიჯები.

მაგალითად, ინტელექტუალური საკუთრების ეროვნული ცენტრმა, რომელსაც 2020 წლის მდგომარეობით საკუთარ ვებ-გვერდზე არ გააჩნდათ საჯარო ინფორმაციის განყოფილება, 2021 წელს მიიღეს ინფორმაციის პროაქტიული გამოქვეყნების ახალი დადგენილება, ხოლო 2022 წელს მისი ინფორმაციის პროაქტიული გამოქვეყნების მაჩვენებელი შეფასდა 95%-ით.

საჯარო და კერძო თანამშრომლობის სააგენტოს 2020 წლის მონიტორინგის ფარგლებში არ ქონდა საკუთარი ვებ-გვერდი, ხოლო 2021-2022 წლების მონიტორინგის პერიოდისათვის ახალ ვებ-გვერდზე შექმნილია საჯარო ინფორმაციის განყოფილება და ინფორმაციის პროაქტიული გამოქვეყნების მაჩვენებელი შეადგენს 95-96%-ს.

სსიპ ციფრული მმართველობის სააგენტოს 2021 წლის მონიტორინგის ფარგლებში არ ქონდა საკუთარი ვებ-გვერდი, ხოლო 2022 წლის მონიტორინგის პერიოდისათვის ახალ ვებ-გვერდზე შექმნილია საჯარო ინფორმაციის განყოფილება, თუმცა ინფორმაციის პროაქტიული გამოქვეყნების მაჩვენებელი შეადგენს 44%-ს.

უწყებები რომლებმაც 2020 წლის IDFI-ს მონიტორინგის შემდეგ დაიწყეს ინფორმაციის პროაქტიული გამოქვეყნება			
საჯარო დაწესებულება	2020 წლის სტატუსი	2021 წლის შედეგი/სტატუსი	2022 წლის შედეგი
საჯარო და კერძო თანამშრომლობის სააგენტო	არ ქონდა ვებ-გვერდი	96%	95%
ინტელექტუალური საკუთრების ეროვნული ცენტრი	არ ქონდა საჯარო ინფორმაციის განყოფილება	მიღებულია ახალი დადგენილება და დაწყებულია ინფორმაციის გამოქვეყნება	95%
საგანგებო სიტუაციების მართვის სამსახური	არ ქონდა საჯარო ინფორმაციის გვერდზე ინფორმაცია გამოქვეყნებული	78%	93%
ბუღალტრული აღრიცხვის, ანგარიშგებისა და აუდიტის ზედამხედველობის სამსახური	არ ქონდა საჯარო ინფორმაციის განყოფილება	60%	63%
ციფრული მმართველობის სააგენტო	-	არ ქონდა ვებ-გვერდი	44%
დევნილთა, ეკომიგრანტთა და საარსებო წყაროებით უზრუნველყოფის სააგენტო	არ ქონდა ვებ-გვერდი	55%	27%
ახალგაზრდობის სააგენტო	არ ქონდა ვებ-გვერდი	18%	22%

საჯარო ინფორმაციის პროაქტიული გამოქვეყნების კარგი პრაქტიკა და რეკომენდაციები

2022 წლის დეკემბრის მდგომარეობით განხორციელებული მონიტორინგის შედეგები აჩვენებს, რომ უწყებების უმრავლესობა კვლავ ვერ უზრუნველყოფს საჯარო ინფორმაციის მაღალი სტანდარტით და თანმიმდევრულ გამოქვეყნებას.

აღსანიშნავია ის ფაქტი, რომ საჯარო დაწესებულებები ინფორმაციის პროაქტიული გამოქვეყნების სტანდარტის დამკვიდრების საწყის ეტაპზე, უფრო მაღალი პასუხისმგებლობით ასრულებდნენ მათზე დაკისრებულ ვალდებულებებს. მაგალითად, 2014 წლის მონიტორინგის შედეგებით, საჯარო დაწესებულებების საერთო მაჩვენებელი შეადგენდა 71%-ს, რაც 11%-ით აღემატება 2021 წლის ანალოგიურ მაჩვენებელს.

2013 წელს საქართველოში დანერგილი სახელმწიფო უწყებების გამჭვირვალობის სრულიად ახალი, პროაქტიული გამჭვირვალობის სტანდარტის მიმართ, საჯარო დაწესებულებების არსებული დამოკიდებულება კითხვის ნიშნის ქვეშ აყენებს ანგარიშვალდებულების ამ მექანიზმის შემდგომი განვითარების პერსპექტივებს. ამ მხრივ განსაკუთრებულ აღნიშვნას საჭიროებს ღია მმართველობის პარტნიორობის (OGP) მთავარი მაკოორდინირებელი უწყების საქართველოს მთავრობის ადმინისტრაციის დამოკიდებულება, რომელიც 2014 წლიდან ფაქტობრივად არ ასრულებს მთავრობის დადგენილებით განსაზღვრულ ვალდებულებებს.

საჯარო ინფორმაციის პროაქტიული გამოქვეყნების თვალსაზრისით არსებული გამოწვევების ფონზე, დადებითად უნდა შეფასდეს 2022 წელს ცალკეული უწყებების მიერ პროაქტიული გამჭვირვალობის უზრუნველყოფის მიზნით გადადგმული ნაბიჯები. მაგალითად, აჭარის უმაღლესმა საბჭომ მიიღო, ინფორმაციის პროაქტიული გამოქვეყნების მნიშვნელოვნად გაუმჯობესებული დადგენილება და დაიწყო შესაბამისი საჯარო ინფორმაციის ვებგვერდზე გამოქვეყნება. ასევე, მიმდინარე მონიტორინგის ფარგლებში იდენტიფიცირებულია დამატებით 7 საჯარო დაწესებულება, რომლებმაც 2020 წლის IDFI-ს მონიტორინგის შემდეგ უზრუნველყვეს ვებგვერდზე საჯარო ინფორმაციის განყოფილების შექმნა და ინფორმაციის გამოქვეყნება.

ცალკეული უწყებების შემთხვევაში ვხდებით ინფორმაციის ზოგიერთი კატეგორიის ჩაშლილად და დეტალურად განთავსების შემთხვევებს. მაგალითად, სტატისტიკის ეროვნული სამსახურის ვებ-გვერდზე ბალანსზე რიცხული უძრავი ქონებისა და გრანტების შესახებ გამოქვეყნებულია დეტალური ინფორმაცია. ასევე, განათლების და მეცნიერების სამინისტროს ვებ-გვერდებზე შრომის ანაზღაურების და სამივლინებო ხარჯების შესახებ ინფორმაცია გამოქვეყნებულია თანამდებობის პირებზე ცალ-ცალკე სახელისა და გვარის მითითებით, ასევე, ავტოსატრანსპორტო საშუალებების შესახებ ინფორმაცია წარმოდგენილია ავტომობილის მოდელის, გამოშვების წელის, შესყიდვის თარიღის, ფასის და ნარჩენი ღირებულების მითითებით.

IDFI-ის მოსაზრებით კარგი პრაქტიკა ითვალისწინებს მაქსიმალურად დეტალური ინფორმაციის გამოქვეყნებას მინიმუმ შემდეგ პუნქტებზე:

მთავრობის დადგენილების მიხედვით გამოსაქვეყნებელი ინფორმაცია	რეკომენდაცია
ზოგადი ადმინისტრაციული კოდექსის 37-ე და მე-40 მუხლების შესაბამისად განცხადებების შესახებ ზოგადი სტატისტიკა.	საჯარო ინფორმაციის მოთხოვნებით შემოსული წერილების რეესტრი, მოთხოვნის თარიღის, გამომგზავნის, ადრესატის, შინაარსის და განხილვის შედეგის მითითებით.
ინფორმაცია სახელმწიფო ქონების გასხვისებისა და სარგებლობაში გადაცემის შესახებ.	ქონების მიმღების, გადაცემული ქონების ჩამონათვალის და მისი საბალანსო ღირებულების მითითებით.
რეკლამის განთავსებაზე გაწეული ხარჯები.	რეკლამის განთავსების ადგილის, რეკლამის სახეობის და საფასურის მითითებით.
ინფორმაცია გაცემული სარგოს, დანამატებისა და პრემიების შესახებ.	თანამდებობრივი სარგოების, სახელფასო დანამატების და პრემიების შესახებ ინფორმაციის თანამდებობის პირებზე ცალ-ცალკე სახელისა და გვარის მითითებით, ხოლო სხვა თანამშრომლებზე ჯამური სახით.
ინფორმაცია ოფიციალურ და სამუშაო ვიზიტებზე გაწეული სამივლინებო ხარჯების შესახებ.	თანამდებობის პირებზე ცალ-ცალკე სახელის და გვარის, მივლინების თარიღის, მიზნის, ქვეყნის და შესაბამისი ხარჯების მითითებით (სასტუმრო, მგზავრობა, დღიური და სხვა). სხვა თანამშრომლებზე მხოლოდ დაჯამებული სახით.
ბალანსზე რიცხული ავტომობილების ჩამონათვალი მოდელის მითითებით.	ავტომობილის მოდელის, გამოშვების წელის, შესყიდვის თარიღის, ფასის და ნარჩენი ღირებულების მითითებით.
საწვავის მოხმარების ხარჯები.	თანამდებობის პირებზე განპიროვნებულ ავტომობილებზე ცალ-ცალკე და სხვა თანამშრომლებზე ჯამურად.
ავტოსატრანსპორტო საშუალებების ტექნიკური მომსახურების ხარჯები.	თანამდებობის პირებზე განპიროვნებულ ავტომობილებზე ცალ-ცალკე და სხვა თანამშრომლებზე ჯამურად.
სატელეფონო საუბრებზე გაწეული ხარჯები.	თანამდებობის პირებზე გაწეული ხარჯები (ჯამურად) და სხვა თანამშრომლებზე გაწეული ხარჯები (ჯამურად).
მიღებული და გაცემული გრანტები.	თითოეული გრანტის მიღების/გაცემის ადრესატის, მისი ოდენობის და მიზნობრიობის მითითებით.

საჯარო დაწესებულებებში ინფორმაციის პროაქტიული გამოქვეყნების ხარისხის გაუმჯობესების მიზნით, სასურველია საჯარო დაწესებულებებმა გაითვალისწინონ IDFI-ს ის ძირითადი რეკომენდაციები, რომელიც ეხება სავალდებულო პროაქტიულად გამოსაქვეყნებელი ინფორმაციის ნუსხის გაუმჯობესებას. ასევე მნიშვნელოვანია:

- საჯარო დაწესებულებებმა უზრუნველყონ საზოგადოებრივი ინტერესის მქონე საჯარო ინფორმაციის ხელმისაწვდომობა. მათ შორის სავალდებულოდ უნდა განისაზღვროს იმ ინფორმაციის გამოქვეყნება, რომელის შესახებაც მოთხოვნით წლის განმავლობაში საჯარო დაწესებულებას მიმართა სამმა და მეტმა განმცხადებელმა;
- საჯარო დაწესებულებები არ უნდა შემოიფარგლონ მთავრობის დადგენილებით გათვალისწინებული მინიმალური სტანდარტით და ინფორმაციას უნდა აქვეყნებდნენ დეტალური სახით (მაგ. თანამდებობის პირთა სახელებისა და გვარების მითითებით);
- უნდა დაინერგოს საჯარო ინფორმაციის ღია მონაცემების ფორმატში გამოქვეყნებისა და მათი ღია მონაცემების პორტალზე data.gov.ge-ზე განთავსების პრაქტიკა.

საჯარო ინფორმაციის პროაქტიული გამოქვეყნების რეიტინგი
(2022 წლის დეკემბრის მონიტორინგის შედეგები)

N	საჯარო დაწესებულება	შედეგი %
1	საფინანსო-ანალიტიკური სამსახური	100
2	განათლების ხარისხის განვითარების ეროვნული ცენტრი	100
3	სტატისტიკის ეროვნული სამსახური	100
4	კონკურენციის ეროვნული სააგენტო	97
5	ტექნიკური და სამშენებლო ზედამხედველობის სააგენტო	97
6	საქართველოს შინაგან საქმეთა სამინისტრო	97
7	თავდაცვის სამინისტრო	96
8	საჯარო და კერძო თანამშრომლობის სააგენტო	95
9	ფინანსთა სამინისტროს აკადემია	95
10	ინტელექტუალური საკუთრების ეროვნული ცენტრი -საქპატენტი	95
11	საქართველოს პარლამენტის აპარატი	93
12	საქართველოს განათლების და მეცნიერების სამინისტრო	93
13	სამედიცინო და ფარმაცევტული საქმიანობის რეგულირების სააგენტო	93
14	დაავადებათა კონტროლისა და საზოგადოებრივი ჯანმრთელობის ეროვნული ცენტრი	93
15	შსს - საგანგებო სიტუაციების მართვის სამსახური	93
16	აღსრულების ეროვნული ბიურო	92
17	დაცვის პოლიცია	92
18	საზოგადოებრივი უსაფრთხოების მართვის ცენტრი - 112	92
19	შსს - სასაზღვრო პოლიცია	92
20	საქართველოს პრეზიდენტის ადმინისტრაცია	92
21	ტურიზმის ეროვნული ადმინისტრაცია	91
22	შსს აკადემია	90
23	რეგიონული განვითარებისა და ინფრასტრუქტურის სამინისტრო	87
24	ჯანმრთელობის ეროვნული სააგენტო	85
25	საავტომობილო გზების დეპარტამენტი	84
26	გარემოს დაცვისა და სოფლის მეურნეობის სამინისტრო	81
27	საქართველოს ფინანსთა სამინისტრო	81
28	იუსტიციის სამინისტრო	80
29	შეფასებისა და გამოცდების ეროვნული ცენტრი	80
30	საქართველოს ნოტარიუსთა პალატა	80
31	გარემოსდაცვითი ინფორმაციისა და განათლების ცენტრი	79
32	შოთა რუსთაველის საქართველოს ეროვნული სამეცნიერო ფონდი	76
33	აჭარის ა/რ-ის განათლების, კულტურისა და სპორტის სამინისტრო	76
34	ოკუპირებული ტერიტორიებიდან დევნილთა, შრომის, ჯანმრთელობისა და სოციალური დაცვის სამინისტრო	75
35	სასამართლო ექსპერტიზის ეროვნული ბიურო	75
36	ბიზნესომბუდსმენის აპარატი	75
37	ოლიმპიური რეზერვების მზადების ეროვნული ცენტრი	75
38	საგანმანათლებლო და სამეცნიერო ინფრასტრუქტურის განვითარების სააგენტო	73

39	სახელმწიფო ჰიდროგრაფიული სამსახური	73
40	განათლების საერთაშორისო ცენტრი	71
41	ვეტერანების საქმეთა სახელმწიფო სამსახური	70
42	საქართველოს საკანონმდებლო მაცნე	70
43	აკრედიტაციის ერთიანი ეროვნული ორგანო – აკრედიტაციის ცენტრი	68
44	აჭარის ა/რ-ის ფინანსთა და ეკონომიკის სამინისტრო	68
45	განათლების მართვის საინფორმაციო სისტემა	67
46	საჯარო რეესტრის ეროვნული სააგენტო	67
47	აჭარის ა/რ-ის ჯანმრთელობის და სოციალური დაცვის სამინისტრო	67
48	სახმელეთო ტრანსპორტის სააგენტო	64
49	სახაზინო სამსახური	63
50	ბუღალტრული აღრიცხვის, ანგარიშგებისა და აუდიტის ზედამხედველობის სამსახური	63
51	სახელმწიფო ქონების ეროვნული სააგენტო	61
52	აჭარის ა/რ-ის სოფლის მეურნეობის სამინისტრო	61
53	სამოქალაქო ავიაციის სააგენტო	59
54	საქართველოს სტანდარტებისა და მეტროლოგიის ეროვნული სააგენტო	57
55	საჯარო სამსახურის ბიურო	56
56	მსს - მომსახურების სააგენტო	56
57	სურსათის ეროვნული სააგენტო	55
58	ეკონომიკისა და მდგრადი განვითარების სამინისტრო	54
59	ღვინის ეროვნული სააგენტო	54
60	საქართველოს ეროვნული არქივი	52
61	აჭარის ა/რ-ის მთავრობის აპარატი	51
62	ციფრული მმართველობის სააგენტო	44
63	შემოსავლების სამსახური	42
64	იუსტიციის სასწავლო ცენტრი	42
65	დაცული ტერიტორიების სააგენტო	41
66	სოციალური მომსახურების სააგენტო	40
67	ეროვნული სატყეო სააგენტო	40
68	სახელმწიფო სერვისების განვითარების სააგენტო	40
69	საგანმანათლებლო დაწესებულების მანდატურის სამსახური	38
70	საგარეო საქმეთა სამინისტრო	35
71	სსიპ - აწარმოე საქართველოში	35
72	მთავრობის ადმინისტრაცია	34
73	იურიდიული დახმარების სამსახური	32
74	სახელმწიფო ზრუნვისა და ტრეფიკინგის მსხვერპლთა, დაზარალებულთა დახმარების სააგენტო	32
75	ფინანსთა სამინისტროს საგამოძიებო სამსახური	31
76	საქართველოს ეროვნული მუზეუმი	31
77	შერიგებისა და სამოქალაქო თანასწორობის საკითხებში საქართველოს სახელმწიფო მინისტრის აპარატი	30
78	სახელმწიფო შესყიდვების სააგენტო	30
79	გარემოს ეროვნული სააგენტო	30
80	ეროვნული თავდაცვის აკადემია	29
81	საზღვაო ტრანსპორტის სააგენტო	28

82	სახელმწიფო დაცვის სპეციალური სამსახური	27
83	დევნილთა, ეკომიგრანტთა და საარსებო წყაროებით უზრუნველყოფის სააგენტო	27
84	იუსტიციის სახლი	27
85	მასწავლებელთა პროფესიული განვითარების ეროვნული ცენტრი	23
86	კადეტთა სამხედრო ლიცეუმი	23
87	ახალგაზრდობის სააგენტო	22
88	ბირთვული და რადიაციული უსაფრთხოების სააგენტო	22
89	სოფლის მეურნეობის სახელმწიფო ლაბორატორია	22
90	მუნიციპალური განვითარების ფონდი	21
91	სოფლის მეურნეობის სამეცნიერო-კვლევითი ცენტრი	21
92	მინერალური რესურსების ეროვნული სააგენტო	21
93	საინფორმაციო ცენტრი ნატოსა და ევროკავშირის შესახებ	15
94	შსს - ჯანმრთელობის დაცვის სამსახური	9
95	კულტურული მემკვიდრეობის დაცვის ეროვნული სააგენტო	7

საჯარო ინფორმაციის გვერდზე არ აქვთ გამოქვეყნებული/განახლებული ინფორმაცია ან მონიტორინგის პროცესში საჯარო ინფორმაციის გვერდი იყო გათიშული		
1	სპეციალური პენიტენციური სამსახური	
2	ეროვნული უსაფრთხოების საბჭოს აპარატი	
3	ბაზარზე ზედამხედველობის სააგენტო	
4	გარემოსდაცვითი ზედამხედველობის დეპარტამენტი	
5	ველური ბუნების ეროვნული სააგენტო	
6	მიწის მდგრადი მართვისა და მიწათსარგებლობის მონიტორინგის ეროვნული სააგენტო	
7	ნავთობისა და გაზის სახელმწიფო სააგენტო	
8	სსიპ დელტა	

ვებგვერდზე არ არის საჯარო ინფორმაციის განყოფილება		
1	ევრაზიის სატრანსპორტო დერეფნის საინვესტიციო ცენტრი	
2	ინოვაციების და ტექნოლოგიების სააგენტო	
3	ლევან მიქელაძის სახელობის დიპლომატიური სასწავლო და კვლევითი ინსტიტუტი	
4	ზურაბ ჟვანია სახელობის სახელმწიფო ადმინისტრირების სკოლა	

5	საქართველოს კინემატოგრაფიის ეროვნული ცენტრი
6	შემოქმედებითი საქართველო
7	რელიგიის სააგენტო
8	სახელმწიფო ენის დეპარტამენტი
9	თავდაცვის სამინისტროს სამხედრო ჰოსპიტალი

არ აქვთ საკუთარი ვებგვერდი	
1	კულტურისა და სპორტის სამინისტრო
2	დანაშაულის პრევენციის, არასაპატიმრო სასჯელთა აღსრულებისა და პრობაციის ეროვნული სააგენტო
3	მსჯავრდებულთა პროფესიული მომზადებისა და გადამზადების ცენტრი
4	ინფორმაციული ტექნოლოგიების სააგენტო
5	საგანგებო სიტუაციების კოორდინაციისა და გადაუდებელი დახმარების ცენტრი
6	დასაქმების ხელშეწყობის სახელმწიფო სააგენტო
7	შრომის ინსპექციის სამსახური
8	ანაკლიის ღრმაწყლოვანი ნავსადგურის განვითარების სააგენტო
9	კურორტების განვითარების სააგენტო
10	კიბერ უსაფრთხოების ბიურო
11	სივრცითი და ქალაქთმშენებლობითი განვითარების სააგენტო
12	სახელისუფლებო სპეციალური კავშირების სააგენტო
13	სახელმწიფო უზრუნველყოფის სააგენტო

